


ديوان

خليها بظروفها

للشاعر / نصار العدوى



حقوق الطبع والنشر محفوظة
لدار الأدباء



اسم الدار	دار الأدباء للنشر والتوزيع
اسم الديوان	خليها بظروفها
اسم المؤلف	نصار العدوى
رقم الإيداع	(٢٣٣٦٨ / ٢٠١٧) بدار الكتب المصرية
الإخراج الفني	دار الأدباء. (عبدالرحمن الصباحي)
الغلاف	من تصميمات الدار

خليها بظروفها

خليها بظروفها ..

خليها بظروفها هتتعديل

ربك بالحال بيبدل

والدنيا ما ديما على حالها

هيجيلها يوم وتتجدد

خليها بظروفها يابلدينا

ونشوف على فين هتودينا

دا الموجه مهمه كانت عاليه

هيجيلها يوم وترسينا

خليها ماشيه وعديها
ربك من عنده يسويها
أيه اللي بإيدك مش عامله
دا حقها وأكثر مديها
خليها بظروفها وأنساها
أرميها بكره هتلقاها
لكن هتفكر تدعيها
هتفضل ماشيه على هواها
وكده أو كده رزقك واخده
وأكثر من كده ما هتلقاها
وخليها بظروفها..

وحشتيني ..

يا زهرة عمرى وحشتيني
بأجمل كلمة سمينى ونادينى
بورقة ورد أو بوسة خد
منك عتشان أسقيني
وداوينى
من سم البعد أشفينى
وتاوينى فى رحلة عشقك وأنسينى
ياكل أطياف الحب أشتقت

من كتر شوقى ليكى تعبت

ناويا فين تودينى

دأنا كل الدنيا معاكى لفيت

ولا قلت تعبت ولا مليت

أتارينى بحلم ولما صحيت

حقيقى معاكى أتمنيت

أكون ضيك أكون ظلك

أكون أول من حبيت

أكون زهرك أكون وردك

أكون حزنك أكون فرحك

أكون ضحكك أكون دمك

أكونك أكثر ما أتمنيت
أيه تاني تقوليلي
لو عيزاني ناديلي
أقول حاضر أقول طيب
أجيك وأنتي عديني
أسافرك أو أرجعك
دأنتي حبيبتي ملكتيني...



أقولك ايه..

عن حبي ليك

بشتاق لحضنك و انا بين ايديك

وسنين حياتي ملهاش وجود

غير لما بكون قدام عنيك

اقولك ايه وانت واقف قدام عنيه

بشوف الدنيا شيله الفرحة و علينا جايه

لو قولت لك كلمة بحبك قليله

لو قولت لك عمري وروحي

وقلبي ليك برضه شويه
أنا عايزة أقولك كلمة تقدر حبي ليك
قد جمالك قد حنانك ونظره عينيك
كلمه تكون قد الحياه قد كل البشر
قد دقائق القلوب قد حبات المطر
كلمه تكون بلون الربيع بلون الورد
لا قالها عاشق ولا يعرفها اي حد
واعيش الحياه اقولها لك
وفي الاحلام ابعتها لك
وتيجي ثاني يوم تقولها لي
تحكي لي وانا افسر هالك..

البداية منتهيه

البدايه زي النهايه
يعني كثير مش فارقه معايا
ايه لو يعني هتبعدي عني
ما ياما أحزان عايشه جوايا

البدايه منتهيه
كل الدنيا بتقسى عليا
ايه لو جرح جديد في حياتي
مش هيبان من كتر ما فيه

كل يومين وتلاته بجرح
من كتر الآمى نسيت الفرح
اسال بختي يرد عليك
مش هيقولك غير ايوه صح
من كتر احزاني صاحبتي
و هموم الدنيا عرفتي
ولو مره قولتها تعبت
تزيد عليا و تألمي
خلاص يادنيا انا سلمت
مش راح اقولك تاني تعبت
مع كل حاجه معاكي فهمت
ورضينا يادنيا بنصيبنا...

محبك قوي

اللي بيني وبينك أيه
حببتك قوي مش عارف ليه
وكنت بنام ولا على بالي
أفكر ولا شيء يشغلي بالي
من غير ما أشوفك ولا حتى أقابلك
لقيت روعي وقلبي حبك
إسمك رسمك غيروني
بزوق وأدب ورقة خدوني
وبقيت أقول جرى لي أيه..؟

نفسي أقابلك

نفسي بجد أقابلك مره
وأحلي بقربك أشواقي المره
وأبوس روحك وأبوس عينك
وأبص بعيني ما أشوف غيرك
وأتمنى يطول العمر معاكى
من غير ما تغيبى ولا ثانية أنساكى
وأطيب روحي وجرحي بإيدك
وأكتبلك بدمي رسالتك فى عيدك
وأقولك ميت مليون حبيبتي
من حسنك وجمالك ربي يزيدك..

حبيب أعيش

أنا أحب أعيش أيامي
زى خيلاني وعمامي
والبس توب الشرف
اللى يكمل مقامي
أحب أعيش طبيعتي
زى ما عشت طفولتي
فى الزرعة تحت القمرة
وأجيب العيش من العمرة

وبحتت جبن وشطة
عمرى ما أنساكى يا أكلة
ولا أنسى معاكى طفولتى
أنا أحب أهلى وناسى
اللى هما ليا أساسى
وأحب أقعد قعدتهم
ولا عمرى أخرج عن توبهم
ولا ليهم أصبح ناسى
يابلدى يا وطنى تحية
لخديجة والست صفيه
ولكل أجدادى وأحبابى
أساس الوحدة الوطنيه ..

ذكرى

أنا وأنت يا حبيبي ذكرى
تحكى علينا الدنيا وبكرى
فين أيامنا الحلوة راحت
بين الآمنا وجراحنا تاهت
لا أنت بأيديك ولا أنا بأيدي
خذت نصيبك وخذت نصيبي
خذنا نصيبنا جراح والآم
ظلمنا الحب بين الأوهام

ماكنش لازم نحب بعض
مش مكتوب إن أحنا لبعض
أوعا تفكر بجرح فيك
لا يا حبيبي دا أنا ببكى عليك
حبك لسه شايله فى قلبى
ولسه شايف حبى فيك
حبى وحبك راحه لغيرنا
وأجيب سرتك وأبكى عليك
أنا مش قادر أخبى فى قلبى
وأحلفك بجمال عنيك
يلى الدنيا فيك ظلمانى

عمرى ماأشوف فى جمالك تانى
يادى الدنيا ويادى الحب
ليه ما كناش أحنا لبعض..



انتهينا خلاص

ولا في باقي من ذكرياتنا
قلبي وقلبك يعيشه اغراب
وتصبح غريبه حياتنا
ناويا تاني ترجعي
ولا ناويه تودعي
ولا سنين نعيش بعاد
ونفكر كل اللي فاتنا
ضحيني كثير من عمرنا

ورجو عنا مش مقسوملنا
خلاص نبعد يا حبيبتي
لو كان البعاد اريحلنا
مهما كنا بنشتكي
وحكايتنا قصة بتنحكي
اكيد في يوم هتحنن قلوبنا
ده اللي بينا ما يتنسي
اصرخ ويصرخ قلب فيا
ولا حد حاسس باللي بيه
دا قصه بينا منتهيه
يا قلبي قبل ما تبتي..

حبك ليا بيظمن

مهما كنت بعيد عنك
تملي برضه قريب منك
وطول ما همسك جوابا
صعب إني أبعد عنك
إنتي إسمي وحروفي
إنتي أنسي من خوفي
لو حتى فين مهما تروحي
حبك ليا بيظمن



بعد كثير وبسافر
وشوقي ليكي مالوش آخر
وأبعد قد ما أبعد عنك
برجع عشائك وبخاطر
بعمرى وروحي وحياتي
بقلبي اللى قال مش هنساکي
وانا عند وعدى أنا ليكي
ياكل حبي تحياتى
حبك ليا بيضمن ..



بكره ها ييجى

بكره ها ييجى وأنتى معايا
ولا حبيبى هتبعد عنى
بكره هموت من كتر البرد
ولا حبيبى هتبقى فى حضنى
ياما حبيبى خايف من بكره
أكون محتلك وأنتا تسيبنى
بكره كلمة ليه مش عارف
بتخوفنى

وبكون قوى ولما أفكره
فيه حاجة منه تضعفنى
سعات فراق وسعات عتاب
وسعات تيجى عشان تجرحنى
لو ظلمتك مرة حبيبى
بترجاك إنك تسامحنى
حبيبى أوعدنى بكلمة بينا
عمر الفرحة لا يوم تفارقنا
وكل مكان سوا رحناه
ينده ليننا تانى ويجمعنا
نزرعه حب وأشجان
ولو عطش تسقيه أشواقنا..

تحت المطر

تحت المطر فارد أديا مغمض عنيا
ضاعت سنين من غير حنين تحت المطر
تحت المطر مافيش أمان
خايف وعائش سنين حرمان تحت المطر
تحت المطر نسيت ذكرياتي
ضاعت حياتي
الكل سابني للمطر
أحلا الأمناني أجمل أيامي

فى ثانية ضاعت

ومعايا غرقت فى عز المطر

ملقتش حد يضمنى

ملقتش حد يحبنى

ملقتش حد ياخد بايدى من المطر

سنين عايشها طريق ماشيها

تايه فيها

ما حد قال لى دى خطر

مشيت للنهايه لقيت سمايا

برق و غيوم وبرضه مطر..

سؤال..؟؟

تسمحي لى أسأل سؤال..؟

جايبه منين كل الدلال

دا الأبتسامة وردة ربيع

والنظرة منك زى الغزال

ساكته ليه كلمينى

أزاي أحبك علمينى

دا العقل شافك عنى تاه

وأسمى ليا نستينى

أكون قدامك ماتشوفنيش

أكلملك مابتريديش

لو تبعدى هقرب أكثر

لو نستيني فيكى هفكر

دا القلم مش سايب أيدى

وطول وقتى تلاقينى بفكر

الكلام فيكى غرام

والسكوت عنك حرام

أنا هتكلم وأكتب ليكى

دا إنتى أجمل ما فى الحسابان ..

فکر

ديما برجع وأقعد أفكر
لذكرى كنا فيها صغيرين
كنا حبايب جيران وقراب
وعلى بعض حنينين
ما كنا نعرف بكرة دا أمته
ولا نعمل حساب لسنين
فى كل يوم ديما بلقانا متواعدين
لا يوم فكرنا زمان يبعدنا

ولا نصيبنا يكون لمين
فجأة بعدنا بقينا لغيرنا
وبذكرياتنا مجروحين
ما كنا نعرف هنكون ضحية
وتروح قلوبنا لناس تتيين
وأهو دلوقتى بنحلم نرجع لزمانا تانى
وبعقل مين
صورتى وصورتك ديما فى خيالى
وقلبى عيشين
وفى النهاية من غير نهاية
حبك فى قلبى
باقى السنين..

مستكرها عليه

دقيقه من وقتك مستكرها عليه
دا انا عمري اديته ليك ومشفتش حاجه ليه
مع السلامه وقتك فض
انا دلوقتي بقيت فى الجد
انا مش هفضل كده ما مرميه
ومفيش حد احسن من حد
اللي فى قلبي ليك هنساه
واي جرح بعد تاه
هقدر افرح و اسعد قلبي

وهبني لروحي من ثاني حياة

متفكرش انا بعدك تو هت

لا دا انا كده فتحت فهمت

اني ضياعي كان على ايدك

وفي اخر لحظه نفسي لحقت..



ذكريات

ذكريات فيها ساعات
ياريتها ترجع من ثاني
فيها وعود و مكان موجود
كان مكانها و مكاني
ذكريات مابتتنسش
مين غيرها ازاي نعيش
دكل مكان سوا روحناه
ذكريات و ما بتتهيش

كل كلمه من كلامنا كان ليها معنى
كل نسمه تبتسم بلحظه وجودنا
حتى الطيور فوق الشجر ليها تغني
والنجوم ويا القمر بميعاد مستتي
وفي النهايه كلام كثير بيوجع مشاعري
انا لو هقول كل الحكايه نهايتها عمري
و سلام سلام يا حبيبتي انا غصب عني
مش قادر اخبي جوايا شوقك قاتلني
لو قلبي فارق دنيتك و بعدت عنك
خليكي فاكراه وخلي قلبك ييجي
يزورني..

کده راضي

رضيت كده ولا لسه عايز أیه تانى
خلتني عايشه وكأني موجه ووخداني
معاك صبرت على حالي
سكينة حامييه وخداني
وقولت أتحمل عاملة هكمل
معاك وعايز أیه تانى
عشتك واتحملتك وكنت باجي على
نفسى

عشان أرضيك أقرب ليك وكنت بظلم أنا



نفسى

قربت لىك أكثر ما أقدر

ويارىتك كنت بتقدر

كل اللى عملته عشان أخليك

تحس بيا وتقدر

لقيتك صعب أنك ترجع

وكل كلمة فيا بتوجع

أستنا ليه معاك تانى

وايه تانى معاك ينفع..



شكلك صعب

شفتكِ شكلكِ صعب عليا
بعد ماكنتي بين أديا
بخاف عليكي قدام عنيكى
برسملك صورة أيا منا اللى جايا
أتغيرتى تبعدى قررتى
حكمتى بإيدك تسيب أديا
ولما أخترتى فراق كملتى
ولو حتى رجعتى



بقيتى مش ليا
سبتينى فى وقت فيه محتجك
تفرق كثير لو كنت جنبك
يعنى مثلاً تقربى منى
كلمة منك أو كلمة منى
أكيد تخففى من اللى عليا
صعب قوى كان اللى بيا
كنت فاكرك هتبقى جنبى
أتاريكى كملتى عليا
مش بأيدى أرجعك
قلبى مابقاش يسمعك



ياريت تختصرى طريق مشتيه

وحدك روحى كمليه

أنا عن نفسى بابى قفلته

بعد ماكنت ليكى فتحته

كنت بحبك أكثر منك

حتى الحب ضيعتيه..



عادات وتقاليد

عادتنا فينا وتقاليدنا
ولا عمرنا نشيل منها أيدينا
واللى أبوه عرق صعيدى
يعرف كلامنا وحواديتنا
عادتنا صعبة مش ساهلة
نقدر على الشدة والمحنة
وفى عز جراحنا ما بتتزف
مانيين أبداً دمعتنا

الكلام عندنا بحساب
ما بنحسبهاش بقلم وكتاب
واللى يقصد يعاشرنا
نفتحله قلبنا قبل الباب
أبويا قالى كلمة زمان
صاحب راجل ما تصاحبش جبان
راجل يكون عليه القيمة
وصون اللقمة راجل ما تتصان
ياولدى أوعاك تقل بنفسك
مهما يقل فى جيبك قرشك
ووصى عيالك زى ما وصيتك

وأوعاك تنسى تراعى أمك
ياولدى الدنيا دى معروف
أعمل خير تعيش معروف
وأوعاك ياولدى تنسى العشرة
وأوصل رحمك أوعا تقصر
ما تقطع تحت أى ظروف
يا أبويا حاضر على عيني
بدموعى وصايتك على جبینى
وعلى قد ما هقدر أدعيلك
ويصبر قلبى على فراقك
وعلى مر أيامى وسنينى..

على سطح بيتنا

على سطح بيتنا طرح الغنب

قبل أوانه أما عجب

ولما طال لونه ما تغير

قطفت عنبة لقيتها ذهب

وعلى سطح بيتنا طرح الغنب

على سطح بيتنا بتحوم الطيور

طير وري طير عمله طابور

وكل طير ينزل يميل

يملا ما عنده يشبع ويقوم

ودى صفات البيت الطيب

البيت الجيد

البيت اللى عمره

خير ما يبور

وعلى سطح بيتنا طرح العنب

على سطح بيتنا فرش القمر

نقعد قعدتنا ويحلا السهر

وكل واحد يحكى حكاية

من حلاوتها ملهاش نهاية

ومن اللى فات



على اللى مات
وتبقى القعدة زى القمر
وعلى سطح بيتنا طرح العنب..



على فين وخذانا يادنيا

على فين وخذانا يادنيا وعلى أى طريق
رايحيين

على طريق النجاة ولا اللى مش راجعين
ماشيين فى سكة طويلة آخرها مش
عارفين

على فين وخذانا أيامك على فرحك ولا
أحزانك

على فين وخذانا يادنيا
سمعنا كثير كلامك وبأمر مسدقين



سنين وخذانا وماشيا على بر بينا مش
راسيه

فى بحر أمواجه عاليًا فيه وخذانا وتايها
ومين يسمع ندانا لو قولنا غرقانين
همومنا ودموعنا علينا غاليه

من كتر اللى احنا فيه بقينا فيها عايمين
وعلى فين وخذانا يادنيا وعلى أى طريق
رايحين

على طريق النجاة ولا اللى مش راجعين



قدر ده.. ولا مكتوب

إنا نفارق بعض
ماكنش حسابنا نيجي في يوم
ياحبيبي ونودع بعضنا
للأيام قالتنا
يوم ماتبعد قلبنا
ولا السنين سابتنا
أى كلام من حبنا
والذمان قدر علينا

وكسر قلوبنا وفرحنا
قدر دا ولا مكتوب
نعيش حياتنا ع الذكريات
والعمر بينا ياعمرونا
كأنه قصة حب مات
والربيع دبلى أوراقه
وأتغيرت كل الحاجات
حتى الطريق نادى علينا
ولا سمعش غير السكات
إيه يعنى قلبين عايشين
بس ماتو من الآهات

يا حبيبي لسه الحياه
بتفكرنى والله بيك
وكل مكان أزوره لوحدي
تلاقيني بنادي عليك
وأفكر الأبتسامه
ونور عنيك ولمسه أديك
والدموع عارفه مكانها
ولأمتي هفضل حزين عليك
لو بعد عمري يبقالي عمر
والله هفضل عايشه ليك..

قلبنا طيب

قلبنا طيب لكن مابقاش ينفع فيك
يا زمان بتعيب على الطيب اللي عايش
فيك

الله يجازيها الحوجة اللي ذلتنا ليك
الله يصبرنا ويساعدنا على اللي أحنا فيه
قلبنا طيب بس أتعيب في زمان قلاب
خلا الطيب بقي يتعيب
وخلا الندل بقاله حساب
خلا الواطى بقاله قيمة

وخلا العالى تحت التراب

خلا الكذب هو الصدق

وخلا الصدق هو الكذاب

عجبي ياناس على ناس شفتها

كنت بإيدى بمسع دمعها

ولما الحظ قام مديهم

بقيت مش باين من تحتها

عشت أيام وسنين مع ناس

كان حلمها يبقالها أساس

ولما القرش جرى فى إديهم

كأنها ما تعرف أبداً ناس

الى يزعل إني مشيتهم
عارف مقامهم و عارف عشيتهم
ولو قابلوني مرة فى سكة
يخلونى أندم على صحبتهم
شوفت يا صاحبي الدنيا
ملهاش أمان أزاى
خلى بالك بقى..



قلبي و عمري اللي ضاع

اعمل ايه أنا قدام نفسى و عينيكي
الوم انا نفسي ولا ابكي عليكى
قوليلي اعمل ايه بعد اللي شوفته معاكى
دلوقتي بس بتقولي يلا الوداع
زنبه أيه تنحرق دا سنين حلوه شفتها
في لحظه لوأكى
ليه فى ثانية كل اللي بينا ضاع
الآقى كله خداع
حرام عليكى حرام

تداوی الجراح بالآم

حرام یهون حبی

حرامی یضیع قلبی

حرام اوی کده

دا انا برضه انسان

انا عمري ما هرجع لیکی تانی ولا

هکون ندمان

أنا بس لو هندم هندم علی اللى کان

روحي خلاص وانسینی زی ما انا هنساکى

هنسى کل دقیقه عشتها زمان ویاکی

یا خساره حبی فیکي



يا خسارة دمعى ليكى
ويا خسارة البسمه
اللي خدتني انا لعنيكي..



كلميني عنك

يمكن أقدر أنسى معاكى أحزاني
وتعوضيني عن اللي فاتتى
وترجعيلى أيامى
برتاح قوى وأنا بسمعك
وأكثر لما أكلمك
ولما عنيا تيجى فى عنيكى
فى أجمل صورة برسمك
كلمينى عنك وعنّى

ما أنتى بقيتى حاجة منى
مقدرش أبعد عنك ثوانى
دا إنتى حبك شيء أسرنى
يلى قلبى فى قلبك تاه
يلى حبك معنى الحياة
إنتى كل حاجة ليا
إنتى كل اللى بتمناه
إنتى شموعى وفرحتى
إنتى طريقى وسكتى
إنتى سكوتى وكلمتى
قوليلى أيه تانى أتمناه

ما إنتى عارفه إنيك ليا
كل حاجة فى الدنيا ديا
مهما أقولك ولا أوصفك
برضه ياعمري عليكى شويه
أنا حبي ليكى مش موصوف
طيب قد أيه لا مش معروف
كل اللي عارفه وأنا وياكى
معرفش حاجه أسمها يا حبيبة قلبي ابدأ
خوف..



حاول ترجع ..

لو كنت فاكِر ظلمك ليا
انا سامحت خلاص ونسيت
بس انت حاول ترجعلى
وتداوى غلطك ياريت
وأوعد قلبي المرادى
انك تاني ما تقسى عليه
انا بسامحك اني بحبك
و انتا ليه بتجرح فيا

وكل ما اقابلك و اجي أعاتبك

ليه بتجيب الذنب عليا

مكنتش ابدأ ترضى ببعدى

كنت ليلا تى بتسأل فيه

العشاق يا حبيبي بتسامح

وبتصالح أول بأول

وأنتا ياما ظلمت جرحت

وأنا من طبعى أنسى وأفوت

وأرجع تانى أغلط نفسى

وتجرح فيا ليه من الأول..

ما أكذبش عليك أنغیرت..

لما هتبع عنى سمعت
وبقيت واحده كده مش عارفه
إن أنا عايشه ولا مت
ما أكذبش عليك إن أنا من بعدك
الآقى مين زيك فى بعدك
يسمع ليا لما أحكيه
وأقرب منه وأرتاح ليه زيك
صعب أنساك

صعب حبيبي أنسى دقيقه
ولو توانى دى مستحيله
مهما بعدت عنى وغبت
الثانية فى بعدك ألف ليله
حياة عشناها ماشفناش حد
تانى زينا عاشها حد
دا لو جبلين عشقو زينا
ولا داقو نعيم حبنا
الى مكانى ما يتحملش
من كتر حزنه أكيد يتهد
قبل ما تمشى خليك فاكر

كل ما ليا معاك هيسافر
حتى الإبتسامة اللى فوق شفائفى
رجوعها تانى مالوش آخر
مع السلامة حبيبى وداع
شبابى بعدك بعتره ضاع
ولو باقى ليا بعدك عمر
هاعيشه دموع وفراق ووداع..



أنت وقلبك اللي ظالمني..

ماجاش على بالك تفكرني
أنت وقلبك اللي ظالمني
لو حبك ليا مش مقصود
خلتني ليه أعدي الحدود
وأخوض بحور أمواجها عالية
من دموع القلوب الغالية
زي قلبي اللي حبك
لو حزين يسعد بقربك

وأنتا كأنك مش داري بيا
ولا قلبك مرة دق عليا
مع إني حيرتي أنتا سببها
وأفكار صادفتني ما كان على بالها
عنيا تقضي الليل سهرانة
وكل جوارحي منك تعبانة
وكل ما بيا يشتكي مني
وكل دا وأنت اللي ظالمني
لو قلبك خلاص أستغنى عني
هاموت بس أعرف
مين اللي قتلني..

بتوحشيني ..

مجرد ما بتغيبي عني

بتوحشيني

ومن تاني يوم بفكر أجلك

أو تجيني

نفسى أرتاح وأريحك

وأقعد جنبك لا أفارقك تاني

ولا أجرحك

بس صعب ومش بأيدي



أكذب عليكى

لو أوعدك

كلمتين بأبتسامة

ساعة الرجوع

وكلمتين ساعة الفراق

بالدموع

وساعات تقوليلى أنا تعبت

لحد كدا

لتاخذنى معاك لتخليك

جنبى هنا

ياريت كان بأيدى يا حبيبتى



أعمل كذا

بس أكذب عليكى

لو أقلك أو عدك

لو تسمعى قلبى وهو

بيقلك سلام

أكيد تعزرينى وتصبرينى

بحبة كلام

بس آه بقولها وأداريها

عليكى

وأبتسملك عشان ما أشوفش

دموع عنيكى



كفاية اللى أنا شايف

يا حبيبتي فيكى

ليه من تانى أعزبك

أو أجرحك ..؟؟

بحبك موووووت ..



ليه مستغربين...؟؟

مستغربين ليه عشان بحبك

هما يعنى بيحبو زيك

ولا يطولو نظرة منك

ده إنتى أثنين ما شافو زيك

ليه مستغربين ياعوازل علينا

قاعدين قايمين قايلين علينا

قولو كل اللى ريحكم

وأحنا لا لينا ولا علينا

لايمين علينا ليه بس يا ناس
دالحب مشاعر ويا احساس
لا بالكلام ولا بالمرسال
دالقلب هو المبنى والاساس
قبل ما تلومو أسألو قلبي
وشوفو جواه شوقى وحبى
كتب مكتوبة بقالها زمان
متزوقه بالورد لأجمل انسان
ولما آجى أحبه تلومو عليا
دا حتى حرام والله يا ناس
ريحو قلبي ليه تتعبونى

لو تعبائين من بالكم أنسوني
دالعمر مره بلاش تحرموني
إني أحب وياريت تسيبوني..



مش هتغير ...

ماغيرنیش بعدادك عنى
لا بالعكس دا فوقتى
من وهم كنت عايم فيه
لو كملت كان دمرنى
مغيرنیش إنك سيبتينى
هقدر تانى أروى سنينى
وزى مايو عرفت أحبك
ساهل إنى أهدم حنينى

أنا من غيرك هقدر اعيش
عادي فراقك ما يهمني
همسح صورتك من خيالي
مش هغلط وأناديكي تاني
دا إنتي كل اللي قدرتي عليه
مررتي كل اللي يحلالي
نسبة حب واحد في المية
وأنا معاكي بحسن النية
ماشى معاكي بقلبي الطيب
وكل واحد حسب ما أتعود
أتعودت أكلنك صافي

أدتك كل الحب الكافى
لا يوم فكرت إنى أأتخان
كنت فأكرك بجد إنسان
يعرف يوفى يعرف يصون
عمره مايغدر مهما يكون
لكن اللى عملت حسابيه
فى الآخر أنا المديون..



طريق الذكريات ..

يا طريق لينا فيكى ذكرى
عائشه معانا فى كل بكره
وفى كل فجر وكل صبح
فيكى قضينا عمر وعشرى
يا طريق ما نسيت مهما بعدت
فايق صاحى أو حتى سكرت
لا والله عمرى ما نسيته
وعالم ربي اذا كنت كذبت

يا طريق بعادى عنك غيرنى
راح الحلم راح التمنى
وبعد ما سيرنا عليكى أثنين
خطاويننا أفترقت والحزن صابنى
يا طريق بتنادى علينا فى غيابنا
بنسمع أنينك وأنسك ما سبنا
من كتر البكى عليكى تعبنا
ومش مكتوب من تانى رجوعنا
خلاص يا طريق العمر ماشى
السن عدى وما ندراشى
مع إنى لسه كنا صغار

مجرد ما بعدنا بقينا كبار
والشكل أتغير والشعر شاب
أمانه يا طريق ما تلومي علينا
والله يا طريق ما علينا عتاب..



بادنيا مالك نسياني..

مفیش ولا مره فاكراني
ولو مره جيت على بالك
الايكي جايه بأحزاني
عایش معاکي علي دمعہ
احزاني فيكي بقت جامعہ
نفسی لنفسي مره اختار
ادوق الحلوه ولو مره
عایش علی ضي احلامي

و نفسي اشوفك يا ايامي

منوراني و قدامي

و لو هتيجي على شمعہ

كل اللي باقي حواليا

احزان كثير جايه عليا

وبدل الورد الآقي الشوق

بحلم وانا ماسكه في ايديا

خلاص وداع يا احلامي

مين المجني على الجاني

مبقتش عارف مين فينا

عليه الحق للتاني..

ياقلبي ليه ..؟؟

ياقلبي ليه محيرنى هواك
شاغل بالك وشاغلنى معاك
كل واحدة حلوة تشوفها
عايز تاخذنى وتجري تفوتها
ولما عنيتها تيجى فى عنيك
فاكرها وقعت طبت فيك
لا ياقلبي ده مش حب
بلاش تتعبنى الله يخليك

ياقلبي أسينا كثير وتعينا
مين حباه وكان من نصينا
لا أنتا ياقلبي بأيديك تقرب
ولا أنا بأيدي كتبت بعادنا
ليه نقضى حياتنا تجارب
خلاص ياقلبي عرفنا مصيرنا
ياقلبي أعزرنى وكفايه جراح
بلاش تفتح فى اللى راح
ده أكثر واحد عارف حكايتى
ياقلبي بلاش تكتب نهايتى
خلاص ياقلبي قفلت دفاترى
وأرجوك ياقلبي تسينى أرتاح..

أكتوبر ..

الى بيا صعبه أوصافه
من كتر نوحى تعبت أجراسه
وكل ما رايحه عنيه خايفه
من الى جاى وشايل جراحه
الى بيا كتير مستخبي
بضحك وجوه يعلم ربي
قول الناس ما بيرحمش
والكلمة كلام ما بيخلص

غصب عنى بمنع دمعى
وأمشى أغنى عشان ماأتهنش
كل ليلة وراها ليلة
آهاتى ساكنة فى قلبى ويلا
وأقول لهمومى أرحمينى
حتى ليلة واحدة سبينى
تقولى قدرى مكتوبلى معاك
لو دقيقة مستحيلة
نهايتى أيه يا دنيا قوليلى
تعبانى ليه فى نهارى وليلى
نفسى أحس مرة انى عايش

بفرحة واحده إسمحيلي
طعم الحلو فيكى مر
يادنيا مرة إبتسميلي
كل الأحزان جيبها عليا
وليه يادنيا مش مكتفيا
لما الورد دبلة أوراقه
جيتى زرعتى الشوك حواليا
آهاتى كويانى قوى مألمانى
أمسح دمعى ينزل تانى
من كتر حزنى بقيت مش عارف
أسم وشكل لون أيامى

موجه وخدانى وتايها بيا
حتى اللى ليا بقيو عليا
ما فيش خلاص حاجة بقيالى
غير إنتى والدموع فى عنيه..



ختام الكلام ..

لو تعرفى إنك إنتى أطيب قلب

وأحن قلب بالنسبالى

لو تعرفى إنك إنتى كل شيء

وماليا عليا الدنيا دى

يا حبيبتي يا روحى وعمرى ونجمى

وقمرى

ونور عنيا

بشتقلك وبحتجلك وبرجلك مليان حنيه

مهما أقولك أنى بحبك

مهما أعيش العمر جنبك
مش كفايه دا أنتى قلبك فرحة عمرى
ودفا لياليه

أحلامى مرسومة على شانك
بضحكتك بجمال أيامك
يلى الدنيا من غيرك إنتى ماتساو يش
همسات كلامك

مهما أكون فى بعادى عنك
لا مال ولا جاه يغنونى عنك
دا إنتى القلب
وإنتى الحب

وكل هنايا ليكي ومنك
من غيرك ماليش أحلام
ولا دنيا يا أحلى غرام
دا إنتى شموعى فى غيايى ورجوعى
وهو دا ختام الكلام..



الفهرس

م	اسم القصيدة	رقم الصفحة
١	خليها بظروفها	١
٢	وحشتيني ..	٣
٣	أقولك ايه..	٦
٤	البداية منتهيه	٨
٥	بحبك قوي	١٠
٦	نفسي أقابلك	١١
٧	حبيب أعيش	١٢

م	اسم القصيدة	رقم الصفحة
٨	ذكرى	١٤
٩	انتهينا خلاص	١٧
١٠	حبك ليا بيضمن	١٩
١١	بكره ها ييجى	٢١
١٢	تحت المطر	٢٣
١٣	سؤال...؟؟	٢٥
١٤	فكر	٢٧
١٥	مستكترها عليه	٢٩

م	اسم القصيدة	رقم الصفحة
١٦	ذكریات	٣١
١٧	كده راضي	٣٣
١٨	شكك صعب	٣٥
١٩	عادات وتقاليد	٣٨
٢٠	على سطح بيتنا	٤١
٢١	على فين وخذانا يادنيا	٤٤
٢٢	قدر ده.. ولا مكتوب	٤٦
٢٣	قلبنا طيب	٤٩

م	اسم القصيدة	رقم الصفحة
٢٧	قلبي و عمري اللي ضاع	٥٢
٢٥	كلميني عنك	٥٥
٢٦	حاول ترجع ..	٥٨
٢٧	ما أكديش عليك أتغيرت..	٦٠
٢٨	أنت وقلبك اللي ظالمني..	٦٣
٢٩	بتوحشيني ..	٦٥
٣٠	ليه مستغربين ؟؟..	٦٩
٣١	مش هتغير ...	٧٢
٣٢	طريق الذكريات ..	٧٥

م	اسم القصيدة	رقم الصفحة
٣٣	يادنيا مالك نسياني..	٧٨
٣٤	ياقلبي ليه ..؟؟	٨٠
٣٥	أكتوبر..	٨٢
٣٦	ختام الكلام ..	٨٦